

Акафист
преподобному Амвросию Оптинскому
*Празднование 10 июля (27 июня), 23 (10) октября,
24 (11) октября - собор*

Кондак 1

Избранный угодниче Божий и чудотворче, великий старче, Амвросие, Оптинская похвало всея Руси дивный наставниче, прославляюще твое в подвизех изрядное житие, приносим многохвальное пение, ты же, яко имеяй дерзновение ко Господу, молися о всех нас, чадах твоих, со умилением зовущих:

Радуйся, преподобне Амвросие, богомудрый учителю веры и благочестия.

Икос 1

Ангельскому житию подражая, отвергл еси вся красная и скоропреходящая тленнаго мира сего и стопы своя направил еси к духовному учителю и прозорливцу старцу Илариону, да наставит тя на путь истиннаго жительствова и благословит на подвиги спасения. Он же, провидев грядущее твое богоугодное житие, посла тя в обитель Оптину, и тамо ты обрел еси себе доброе пристанище. Сие увидевше таковое Божие изволение о тебе, глаголем сицевая:

Радуйся, Богом избранная отрасли благочестия родителей; Радуйся, измлада лет твоих Господа возлюбивый. Радуйся, к книжней мудрости усердие от юности имевый; Радуйся, святых отцев духоносное учение познавый. Радуйся, скорогибнущих благ мира сего отвержение; Радуйся, нетленных сокровищ

неослабное желание. Радуйся, Божия произволения о спасении души твоея искавый; Радуйся, благословение на путь монашеский получивый.

Радуйся, преподобне Амвросие, богомудрый учителю веры и благочестия.

Кондак 2

Видя сердца твоего благое намерение, Христос предначерта узкий и тернистый путь твоего спасения, и, егда был еси внезапно на смертном одре болезни, даде Господу обещание: аще исцелит тя, всего себе предати подвигом иночества. Востав же по милости Божией с одра болезни, абие прославил еси всещедрого Бога, Врача душ и телес, зовя: Аллилуиа.

Икос 2

Разум Божественных писаний стяжав, в страхе Божиим помышлял еси, како Господь устроит грядущий путь твоего спасения и како вступить на стезю многотрудного и скорбного монашескаго жительства. Мы же, дивящися твоему благому намерению, воспеваем ти:

Радуйся, на Бога Промыслителя всю надежду возложивый; Радуйся, токмо Его благоизволения взыскавый. Радуйся, всякое испытание во спасение души понести готовый; Радуйся, совести своея велению последовавый. Радуйся, увеселения мирская возненавидевый; Радуйся, богатства земная возлюбивый. Радуйся, Богу единому поработати всего себе подвигнувый; Радуйся, Тому точию угодити восхотевый.

Радуйся, преподобне Амвросие, богомудрый учителю веры и благочестия.

Кондак 3

Силою любви утверждаяся, в вере поревновал еси Евангельское житие стяжати по образу преподобных отцев Церкви древния. Егда же даде ти Господь разумение сего благоугождения, воспел еси со умилением: Аллилуиа.

Икос 3

Имея крепкую веру во благое промышление Божие о спасении человека, притекл еси к честному образу Пресвятыя Богородицы «Тамбовския», еже бысть тебе благословение родительское, и смиренно молил еси Владычицу, да управит путь твой. Мы же, видяще твое неотступное упование на милость Царицы Небесныя, поем ти:

Радуйся, Божия Матере верное и возлюбленное чадо: Радуйся, Ея священнаго покрова силы тайное постижение. Радуйся, благословения родительскаго чрез Ея образ добронравный хранителю; Радуйся, Заступницы усердныя благоговейный почитателю. Радуйся, многочастне в нощи молитвы к Ней слезно возносимый; Радуйся, небесный помощи от Нея непостыдно восприемый. Радуйся, тако утешение в сердце своем обретый сладостное; Радуйся, яко умиление приял еси благодатишное.

Радуйся, преподобне Амвросие, богомудрый учителю веры и благочестия.

Кондак 4

Бурею помышлений движимый, пришел еси в обитель преподобнаго Сергия Радонежскаго, да укрепит твое сердце на подвиги предстоящаго иноческаго поприща всея России чудотворец и учитель монашескаго делания, преизливающий от раки своих честных мощей токи благодатныя помощи Умилился же тамо сердцем взывал еси с радостию: Аллилуиа.

Икос 4

Слыша велие житие и благочестие богомудрых отцев и старцев Оптины пустыни, тайно оставил еси мир и вся, яже в нем, и пришел еси необинуясь в обитель сию в смирении души, во еже спастися и угодити Богу. Мы же, видяще вящую ревность души твоя, приносим ти хвалебную песнь:

Радуйся, тленные блага мира сего ни во чтоже вменивый; Радуйся, сладость церковную познавый. Радуйся, во обитель святую вселивыйся; Радуйся, всего себе Богу отдавый. Радуйся, заповеди Божия неленостно исполнивый; Радуйся, плоды Христова учения сладце вкусивый. Радуйся, подвигов святых отцев ревнителю; Радуйся, чистоты душевныя неусыпный хранителю.

Радуйся, преподобне Амвросие, богомудрый учителю веры и благочестия.

Кондак 5

Богозданная пустынь прия тя, яко во объятия отча, в нюже кротко вселился еси и тамо первее понесл еси

труды послушания в келии великого старца богопросвещеннаго Льва, им же наставлен был еси к духовному деланию. Уведев же сладость отречения воли своея, возопил еси: Аллилуиа.

Икос 5

Видяще твое иноческое преуспеяние, облекоша тя отцы пустыни в ризы схимы великия. И сподоби тя подвигоначальник Христос благодати ангельскаго чина приобщитися, сего ради вопием ти:

Радуйся, всем сердцем Бога возлюбивый; Радуйся, всею душою Ему послуживый. Радуйся, веру чрез многия труды непреложно утвердивый; Радуйся, надеждою на помощь свыше себе вооруживый. Радуйся, любви Евангельския сокровище; Радуйся, Духа Святаго вместилище. Радуйся, подвигов монашеских воине доблественный; Радуйся, равноангельскаго жития подражателю предивный.

Радуйся, преподобне Амвросие, богомудрый учителю веры и благочестия.

Кондак 6

Проповедник православный веры и истиннаго жития во Христе Иисусе явился еси, противныя Евангелию и Церкви учения отрицая, и многия от пути заблуждения обратил еси ко Христу Жизнодавцу, поя благодарственно: Аллилуиа.

Икос 6

Возсиял еси, яко свеща многосветлая, в земли Российстей, просвещая всякаго человека приходящаго к тебе, светом истины, людие же,

обремененнии грехми и скорбьми многими, обретоша в тебе богоразумнаго наставника благочестия и добраго отца всем немощствующим, страждущим и уничиженным, воспевающе таковая:

Радуйся, светильниче православныя страны Российския; Радуйся, зеркало Божественныя любви. Радуйся, столпе веры апостольския; Радуйся, камению надежды жизни вечныя. Радуйся, наставниче во всяких обстояниях боговдохновенный; Радуйся, проповедниче покаяния рачительный. Радуйся, врачу недугов телесных; Радуйся, целителю болезней душевных.

Радуйся, преподобне Амвросие, богомудрый учителю веры и благочестия.

Кондак 7

Хотя последовати самому Христу, подражал еси Ему всеусердно, взял иго Его на себе, и, научився от Него кротости и смирению, обрел еси покой души своей, зовущей присно: Аллилуиа.

Икос 7

Новая и дивная звезда святости явися на небе церковнем, егда восшел еси по лестнице духовней к совершенству ангелоподобному, простерл еси лучи любви своея по лицу всея земли русския и привлекл еси к себе знатная и хутородная, мудрая века сего и немудрая, вопиющая к тебе сицевая:

Радуйся, граде, верху горы стояй; Радуйся, светило, мрак неведения прогоняющее. Радуйся, вся немощная врачуай; Радуйся, от бед и прельщений

вражеских избавляяй. Радуйся, печальных
утешителю; Радуйся, жаждущих духовный
напоителю. Радуйся, хитрословеснаго мудрования
века сего обличителю; Радуйся, многих заблудших на
путь истины исправителю.

Радуйся, преподобне Амвросие, богомудрый
учителю веры и благочестия.

Кондак 8

Странником и пришельцем в земнем мире предстал
еси, взыскующим града небеснаго, и понесл еси
тяготы и немощи ищущаго у тебе помощи ближняго,
и тако исполнил еси закон Христов, поя с
благодарением: Аллилуиа.

Икос 8

Весь огнем Божественныя любве исполненный,
крест многотрудный болезней телесных пронесл еси
через все твое иноческое житие, в терпении стяжав
душу твою, по слову Евангелия Христова, и всех нас
научил еси безропотному крестоношению, зовущих
ти:

Радуйся, вождю ищущих спасения; Радуйся, образе
истиннаго послушания. Радуйся, сам тяжкие недуги
до конца претерпевый; Радуйся, приходящая к тебе в
болезнях и печалех терпению научивый. Радуйся,
паствы твоя изрядный душепопечителю; Радуйся,
алчущих жизни вечныя питателю. Радуйся,
обидимых покровителю; Радуйся, непокорных воли
Божией вразумителю.

Радуйся, преподобне Амвросие, богомудрый

учителю веры и благочестия.

Кондак 9

Все естество человеческое в болезнях и телесных немощех испытал еси, плоть распяв со страстьми и похотьми, и молитвою неустанною отгонял еси напасти и искушения лукавых духов и тем вся научал еси противостати кознем диавольским, взывая с верою: Аллилуиа.

Икос 9

Витийства суемудрых, неведавших силы веры православныя, отметал еси словом Божиим и чистым житием твоим, и воистину возсиял еси, яко светозарный столп благочестия и хранитель святоотеческаго предания, усердно прелагая древняя писания отцев в письма удобообразумительныя. Мы же, дивящися трудом твоим, воспеваем сице:

Радуйся, веры правыя адаманте; Радуйся, жития по вере крепосте. Радуйся, духа благочестия насадителю; Радуйся, добродетелей христианских сеятелю. Радуйся, подвигов старчества преуспеяние; Радуйся, множества иноков духовное просвещение. Радуйся, приведый тех ко спасению; Радуйся, обративый многия грешныя к покаянию.

Радуйся, преподобне Амвросие, богомудрый учителю веры и благочестия.

Кондак 10

Спаستися взыскующим Царства Небеснаго вспомоществуя, верный путеводитель явился еси, мирския и духовныя управляя: в конец лет своих

многия труды положил еси, обитель Шамординскую убогим устроая, да сестры тоя обретут душевный покой и спасение, воспевающе песнь хвалебную: Аллилуиа.

Икос 10

Стена и прибежище был еси чадом твоим, молитвами неусыпными от демонских наваждений охраняя; на невидимую брань с духи злобы их вдохновлял еси, гордость и славолюбие смирением упраздняя, темже радуящися, зовем ти:

Радуйся, стрелы вражия угасивый; Радуйся, демонския полки победивый. Радуйся, пленных от духов злобы свободивый; Радуйся, из темницы страстей многия души изведый. Радуйся, любовь и молитвами заблудшия к Богу обративый; Радуйся, сирот и вдовиц добрый попечителю. Радуйся, водительства иноков и инокинь богоносный зиждителю; Радуйся, смиренномудрия и кротости доброгласный проповедниче.

Радуйся, преподобне Амвросие, богомудрый учителю веры и благочестия.

Кондак 11

Пение умиленное приносим ти, скорому помощнику в нуждах и печалех всем, к тебе с верою и любовью притекающим, до конца дней своих был еси чадолюбивый отец страждущих и обремененных, чающих утешения души. Темже неложно прославляется тобою Бог, дивный во святых Своих, зовущих непрестанно: Аллилуиа.

Икос 11

Светильника добродетелей видеша в тебе вси концы, отче наш Амвросие, яко в терпении и смирении земное странствие скончал еси и исполнил еси вся, яже заповеда нам Христос во Святем учении, и преселился еси от земли на небо, внидя в радость Господа своего, яко верный раб Христов. Темже радуящися, воспеваем ти таковая:

Радуйся, усердный слуго, сотворивый волю Господина своего; Радуйся, воине Христов, суету житейскую оставивый. Радуйся, Богу единому послуживый; Радуйся, вся заповеди Божия исполнивый. Радуйся, обители небесныя удостоивыйся; Радуйся, горния славы приобщивыйся. Радуйся, наследниче жизни вечныя; Радуйся, угодниче Божий прехвальный.

Радуйся, преподобне Амвросие, богомудрый учителю веры и благочестия.

Кондак 12

Благодати Божия сокровище некрадомое унаследовал еси и тихое, безмятежное пристанище на небесех обрел еси. Действием же промысла Божия во дни торжествуемая тысящелетия Крещения Руси прославлен и к лику святых причислен был еси, ублажающе память твою святую, поем вси: Аллилуиа.

Икос 12

Поюще твое всероссийское прославление, возносим ти, яко благоухание кадильное, смиренныя наша молитвы, не забуди чад твоих, почитающих имя твое

святое и взывающих к тебе в благодарении:

Радуйся Амвросие, Божественного бессмертия тезоименитый; Радуйся, Церкви Православная чесная похвало. Радуйся, лика святых угодников причастниче; Радуйся, сонма преподобных отцев сотаинниче. Радуйся, пред престолом Бога Всевышняго наш твердый предстателю; Радуйся, пред судом Божиим наш теплый ходатаю. Радуйся, нас, странствующих в юдоли плачевней, путеводителю; Радуйся, о всей земли Российской неусыпный молитвенниче.

Радуйся, преподобне Амвросие, богомудрый учителю веры и благочестия.

Кондак 13

О дивный угодниче Христов и чудотворче, преподобне старче наш Амвросие, прими ныне малое моление недостойных чад твоих, не остави нас в скорбех и болезнях, прииди и простри руку помощи, настави нас на путь покаяния и спасения, во еже избавитися муки вечныя, да тобою присно славим Бога, вопиюще: Аллилуиа.

(Этот кондак читается трижды, затем икос 1 и кондак 1)

Икос 1

Ангельскому житию подражая, отвергл еси вся красная и скоропреходящая тленного мира сего и стопы своя направил еси к духовному учителю и прозорливцу старцу Илариону, да наставит тя на путь истинного жительства и благословит на подвиги спасения. Он же, провидев грядущее твое богоугодное житие, посла тя в обитель Оптину, и тамо ты обрел

еси себе доброе пристанище. Сие увидевше таковое Божие изволение о тебе, глаголем сицевая:

Радуйся, Богом избранная отрасли благочестия родителей; Радуйся, измлада лет твоих Господа возлюбивый. Радуйся, к книжной мудрости усердие от юности имевый; Радуйся, святых отцев духоносное учение познавый. Радуйся, скорогибнущих благ мира сего отвержение; Радуйся, нетленных сокровищ неослабное желание. Радуйся, Божия произволения о спасении души твоея искавый; Радуйся, благословение на путь монашеский получивый.

Радуйся, преподобне Амвросие, богомудрый учителю веры и благочестия.

Кондак 1

Избранный угодниче Божий и чудотворче, великий старче, Амвросие, Оптинская похвало всея Руси дивный наставниче, прославляюще твое в подвизех изрядное житие, приносим многохвальное пение, ты же, яко имеяй дерзновение ко Господу, молися о всех нас, чадах твоих, со умилением зовущих:

Радуйся, преподобне Амвросие, богомудрый учителю веры и благочестия.

Молитва первая

О великий старче и угодниче Божий, преподобне отче наш Амвросие, Оптинская похвало и всея Руси учителю благочестия! Славим твое во Христе смиренное житие, имже Бог превознесе имя твое еще на земли тебе суща, наипаче же увенча тя небесною честью по отшествии твоём в чертог славы вечныя. Приими ныне моление нас, недостойных чад твоих,

чтущих тя и призывающих имя твое святое, избави нас твоим предстательством пред престолом Божиим от всех скорбных обстояний, душевных и телесных недугов, злых напастей, тлетворных и лукавых искушений, низпосли Отечеству нашему от великодаровитаго Бога мир, тишину и благоденствие, буди непреложный покровитель святыя обители сия, в нейже в преуспейнии сам подвижался еси и угодил еси всеми в Троице славимому Богу нашему, Ему же подобает всякая слава, честь и поклонение, Отцу и Сыну и Святому Духу, ныне и присно, и во веки веков. Аминь.

Молитва вторая

О преподобне и богоносне Отче наш Амвросие! Ты поработати Господеви желая, zde вселился еси и неленостно во трудех, во бдениих, в молитвах и постех подвижался еси, и был еси наставник монашествующим, всем же людям учитель ревностный. Ныне убо, по отшествии твоём от земных Небесному Царю предстоя, моли благость Его, еже ущедрити место селения твоего, святую обитель сию, идеже духом любви твоея неотступно пребываеши, и всем людям твоим, с верою к раце мощей твоих припадающим, во благая прошения их исполнити. Испроси у милостиваго Господа нашего, да ниспослет нам обилие благ земных, паче же яже на пользу душ наших да дарует нам, и скончати житие сие привременное в покаянии да сподобит, в день же судный деснаго предстояния и наслаждения во Царствии Своем да удостоит во веки веков. Аминь.

Молитва третья

О всечестный старче преславныя и дивныя Оптины пустыни, преподобне и богоносне отче наш Амвросие! Церкви нашея доброе украшение и благодатный светильниче, небесным светом всех озаряяй, красный и духовный плод России и всея подсолнечныя, души верных обильно услаждаяй и увеселяяй! Ныне с верою и трепетом припадаем пред цельбоносною ракою святых мощей твоих, ихже на утешение и помощь страждущим милостивно даровал еси, смиренно молим тя сердцем и усты, отче святыи, яко всероссийскаго наставника и учителя благочестия, пастыря и врача душевных и телесных недугов наших: воззри на чад твоих, зело согрешающих в словесех и делех, и посети нас многою и святою своею любовию, еюже славно преуспел еси еще во дни земныя. А наипаче по праведней твоей кончине, наставляя в правилех святых и богопросвещенных отцев, вразумляя нас в заповедех Христовых, в нихже добре поревновал еси до последняго часа твоея многотрудныя иноческаго жизни; испроси нам, немощствующим душею и бедствующим в скорбех, благопри-ятное и спасительное время на покаяние, истинное исправление и обновление нашего жития, в нем же мы, грешнии, осуетихомся умом и сердцем, предахом себе непотребным и лютым страstem, пороком и беззаконием, имже несть числа; прими убо, соблюди и покрый нас кровом твоея многия милости, ниспосли нам благословение от Господа, да понесем благое иго Христово в долготерпении до конца дней наших, чающе будущаго живота и

Царствия, идеже несть печаль, ни въздыхание, но жизнь и радость бесконечная, изобильно проистекаемая от единого, всесвятого и блаженного источника безсмертия, в Троице покланяемаго Бога, Отца и Сына и Святаго Духа, ныне и присно, и во веки веков. Аминь.